

## أهدانا مركبة غرقانة

ركبت الموجه أخذتني بعيد م الشط  
خدتنا مركبة تايهة وبلطنا سوى في الخط  
ولا قائد يوصلنا لبر أمان..  
ولا قبطان  
وحاسس قلبي اتشال واتحط  
مشينا وسط دوامة ولا عارفين  
حدود بكرة ولا بعده  
بقينا من المرار شاربين  
وناس واكله ومالية كروش  
وناس سارقة وبائية عروش  
وأنا وإنت في وسط الموج بنصارع حياة أو موت  
بنتقاتل عشان القوت  
نقول نصبر ما نافع صبر  
وقطر العمر بينا يفوت  
يا ناس أيه العمل والحال  
إمتي تتحسن الأحوال  
إمتي حيكون لنا قيمة في وسط الخلق  
إمتي حنبطل السخرة ف بلاد الخلق  
بلادنا كلها خيرات

لكن فيها الحرامية بقوا بشوات  
وانا الزارع..  
وانا الحاصد..  
وانا الصانع..  
وانا المهني..  
وانا التاجر..  
أنا الحافي ما لاقى فتات  
أنا حسبي إليك يا رب  
تنصرنا وترجع مصر زي زمان  
نعيش في أمان فيطرح بالأمل بستان  
وكل الدنيا تتمنى تيجي تزورنا  
وكل الدنيا تتمنى تيجي تزورنا  
تقول دي مصر أم الدنيا والخيرات  
نسيم فواح  
ولا بلحة ولا لمون  
ولا زرع العقول في الأرض  
بدعي ف سنّتي والفرض  
تعيشي يا مصر لولادك  
شمال وجنوب.. شرق وغرب  
حدود محمية من ربك  
بخط الطول وخط العرض